

Fan däi fisker un siin wiif



fan

Philipp Otto Runge

up Oostfräisk fertóolt fan

Oen Diirk Feldman

2. uplóóeğ

©2024 Onno Dirk Feldmann

uutgever:

Onno Dirk Feldmann

Rajenstr. 68

26810 Westoverledingen

drük:

epubli - 'n denst fan d' neopubli GmbH, Berlin

Bibljoogóófsk inf'rmóósje fan d' Düütsk

Nóósjenóólbibtäik:

Däi Düütsk Nóósjenóólbibtäik ferbaukt disser publikóósje; nibber bibljoogróófsk dóóten bünt up 't internet oover <http://dnb.d-nb.de> t' ferkriigen.

D'r was insent 'n fisker, däi woonde mit siin wiif t'hôop in 'n lütje pullenhütje bii d' säj. Däi fisker gung aldóoëğ nóó d' säj tau, um t' fiskern.

Doo häi insent bii d' säj t' aangeln sat un up 't boer wóóter keek, tjukde t'móól wat an siin äies un reet däi hóóek däip andóól. Un as häi siin fangst anhoög truk, broch häi 'n grôot but fandağ.

Däi but see teegen hum: "Ik beed dii, dat duu mii 't leevend letst! Ik bün ġiin räecht but, ik bün 'n biihekst prins! Set mii weer in 't wóóter un lóót mii swemmen!"

"Süüsoo", see däi fisker, "duu bruukst näit groot wat säegen; 'n but däi prooten kan, wil 'k je wies weer swemmen lóóten."

Doo set'de häi däi but weer in 't wóóter un as disser fandöör swum, achterleet häi 'n bóón fan blaud in 't wóóter.

As däi dağ d'r heer was, kwam däi fisker in huus un fertelde siin wiif, wat d'r geböört was. D'r fan, dat häi 'n but fangen haar, woo däi see dat häi 'n biihekst prins was un woo häi hum weer swemmen leet.





"Hest duu dii dan häil niks wünskert?" frooğ siin wiif.

"Nee!", see häi doo, "Wat sul ik mii dan wünskern?"

"Ach!", see siin wiif doo, "Dat is do mis! Altiid in 'n óserğ fuul pullenhütje woonen! Góo do insent tau un wünsker us 'n lütjet huus!"

Däi fisker was 't näit häil recht, man häi gung weer nóó d' säj tau. As häi bii 't öyver kwam was däi säj geel un gröyn klöört. Doo gung häi an 't wóóter stóón un see:

"Mantje! Mantje! Timpke täj!

Butje! Butje in d' säj!

Miin wiif, däi IIsbil,

wil näit soo as ik wal wil."



Doo kwam däi but answummen un see teegen däi fisker:

"Wat wil s' dan?"

"Ach!", see däi keerl doo, "Ik heb dii do fangen, dūs säeğt miin wiif, ik haar mii wat wünskern sult. Säi mağ näit meer in 't pullenhütje woonen un wil gern 'n lütjet huus hebben."

"Góó man tau", see däi but, "säi sit't d'r al in."

Doo häi weer bii siin wiif kwam, stun dat in d' döer fan 'n näej huus un see teegen hum: "Kum in! Nuu is 't do fööl beeter mit us!"

As häi binnen kwam wassent d'r ruum nauğ kóómers; f'rdan 'n woonkóómer, 'n slóópkóómer un 'n kööken.

Achter 't huus was 'n lütje tûun mit allerlai gröyent un loof un d'r teegen was no 'n lütjet hof mit wat hauner un óónten.

Ach!", see däi fisker doo, "Nuu willent wii ferhöyğt leeven."

"Jóó!", see dat wiif, "Dat willent wii daun."



Soo gung dat ook 'n stük of färtain dóóeğ, man doo see dat wiif:

"Keer! Dat huus word't mii t' naau, däi tûun is t' lütjet un dat hof t' min. Ik wil nuu in 'n stäinen slot woonen. Góó nóó d' but tau; häi sal us 'n slot daun!"

"Ach wiif", see däi fisker doo, "däi but het us do net akróót 'n huus dóón, ik mağ näit no insent koomen un däi but nóóst no ferdräitelk móóken."

"Wat", see dat wiif, "häi kan 't fan rechtens gaud daun un dee dat seeker geern! Góó nuu tau!"

Doo gung däi fisker tau, man sünner gêaud gewäiten. As häi bii d' säj kwam was 't wóóter fan tsangen un dunker blâau klööer, man däi wóógen wassent kalm. Doo gung häi stóón un see:

"Mantje! Mantje! Timpke täj!

Butje! Butje in d' säj!

Miin wiif, däi llsbil,

wil näit soo as ik wal wil."

"Wat wil s' dan?", see däi but.

"Ach!", see däi fisker, mit 'n häiel biidröyvt stäem, "Miin wiif wil in 'n stäinen slot woonen."

"Góó man tau, säi staaht d'r al fööer", see däi but.

Doo gung däi fisker tau un siin wiif stun fööer 'n grôot plaajs.

"Süü keerl!", see s', "Wat is 't nuu mooj!"



Mit nanner gungent s' d'r in. D'r wassent densten, däi müren wassent skier un gollen staulen un tóóvels stunnent in d' sóól. Achter 't slot was 'n tûun un 'n holt, wal ruugweğ 3000 faut lang.

Dat holt burğ harten, räjén un hóósen un up 't hof gaf 't 'n kaustâal un 'n peerstâal.

"Ach!", see däi fisker, "Nuu willent wii ook in 't môoj slot bliiven un t'free weesen!"

"D'r willent wii no insent oover slóópen", see dat wiif un doo gungent s' up bær.

Up d' anner mörn, doo 't wiif wóóker wur, was 't al middağ. Săi dubde hōör keerl fut mit 't elbōoğ in d' siid un see: "Keerl! Anhooğ! Nuu mautent wii kōōnenk oover âal dat land worden!"

"Ach wiif!", see dăi fisker doo, "Woo wult duu kōōnenk woorden? Dăi but kan 't seeker năit daun."

"Keerl!", see dat wiif, "Góó straks nóó d' but! Ik maut kōōnenk weesen!"



Doo gung däi fisker häil biidroyvt tau, um dat siin wiif köönenk worden wul. Un as häi bii d' säj kwam, was dat wóóter swaartklöört un wóógde up un dóól. Doo gung häi stóón un see:

"Mantje! Mantje! Timpke täj!

Butje! Butje in d' säj!

Miin wiif, däi llsbil,

wil näit soo as ik wal wil."



"Wat wil s' dan?", see däi but.

"Ach!", see däi fisker, "Miin wiif wil köönenk worden."

"Góó man tau, säi is 't al", see däi but.

Doo gung däi fisker tau un as häi bii d' plaajs kwam,
wassent d'r suldóóten mit trummen un keedeltrummen.
Siin wiif sat up 'n hôoĝ troon fan gold un djóómanten.
Säi haar 'n grôot gollen krôon up d' kop un an elker
kâant sööm jüffers, elk 'n kop lütjerder as däi anner.



"Ach!", see däi fisker, "Büst duu nuu köönenk?"

"Jóó!", see s' doo, "Ik bün köönenk!"

Un as häi hōör 'n setje ankeeken haar, see häi: "Ach wiif!
Wat let't dat mooj d'r fan of, dat duu nuu köönenk büst.
Düs wil ik ook niks meer wünskern."

"Nee keer!", see s' doo, "mii dürt 't âal t' lâang. Doo ik köönenk bün, wil 'k nuu ook kaiser worden!"

"Ach wiif!", see däi fisker doo, "Woosoo wult duu kaiser worden?"

"Keer!", see s', "Góó nóó d' but tau, ik wil kaiser worden!"

"Ach wiif!", see däi fisker doo, "Kaiser, dat kan häi seeker näit. Ik maġ hum dat näit fróógen."

"Ik bün köönenk", see dat wiif doo, "un duu büst miin keerl, dūs góó rad hen!"

Doo gung däi fisker tau un as häi soo leep doch häi bii sük: "Dat löpt teegen. Kaiser is t' fööl. Däi but word't up 't læest no dül up us."

Doo häi bii d' säj kwam, was dat wóóter gnidswaart un dik as ölje. 'T gung 'n buustert d'r oover weġ, dat hum däi fingertippen kullent. Häil biinaaut gung häi stóón un see:

"Mantje! Mantje! Timpke täj!

Butje! Butje in d' säj!

Miin wiif, däi IIsbil,

wil näit soo as ik wal wil."

"Wat wil s' dan?", see däi but.

"Ach!", see häi doo, "Miin wiif wil kaiser worden."

"Góó man tau", see däi but, "Säi is 't al."



Doo gung däi fisker tau un as häi in 't slot kwam, sat siin wiif up 'n no hoogerder troon, däi in 't gehäil fan gold was. Up 't hoofd haar säi 'n krôn, däi was twei ellen hoog, un an elker kâant stunnent worders; âal t'hôop in d' rîig, elk 'n endje lütjerder an däi d'r teegen. Fan 'n grôot röes bit tau 'n lütje keerlke hen, däi net akróót soo groot as 'n lütje finger was. Fööer hör stunnent gróófen, haartoogen un anner eedellüü.

Doo kwam dāi fisker bii hōör un frooĝ: "Wiif! Büst duu nuu kaiser?"

"Jóó!", see 's doo, "Ik bün kaiser."

"Ach!", see dāi fisker un keek hōör recht lâang an, "Wiif wat is dat mooj, dat duu nuu kaiser büst!"

"Keer!", see s' doo, "Wat staaĝt duu no dor! Ik bün nuu kaiser, nuu wil ik ook no paaus woorden!"

"Ach wiif!", see dāi fisker, "Woo wult duu paaus worden? Paaus is man äits äien in d' häiel kristendaum!"

"Keer!", see s' doo, "Ik maut fandóóeĝ no paaus worden!"

"Nee wiif", see häi doo, "Tau d' paaus kan dāi but dii näit móóken, dat gaajt nooĝt näit."

"Keerl, wat 'n kweedeln! Um dat häi kaisers móóken kan, kan häi ook paausen móóken. Góó nuu tau!"

Doo gung dāi fisker tau, man hum was 't raajn biinaut tau. Dat bāinwaark trielde hum un up buuten gung dāi wind d'r gaud t' keer, soo dat dāi skóópen fan nood up un dóól rōndent un dāi bulgen as maal joogent un dansdent. In d' middent fan d' heemel was no wat lücht t' säin, man fan d' kanten look d'r 'n grōot unwêer up.

Doo kwam häi biinaut un bâang t' stóón un see:

"Mantje! Mantje! Timpke täj!
Butje! Butje in d' säj!
Miin wiif, däi llsbil,
wil näit soo as ik wal wil."

"Wat wil s' dan?", see däi but.

"Ach!", see däi keerl, "Miin wiif wil paaus worden."

"Góó man tau", see däi but, "Säi is 't al."

Doo gung häi tau un doo häi in 't slot kwam, sat siin wiif up 'n troon fan ruugweğ 10.000 faut höeğt. Up 't hoovd haar s' drei grôot kroonen un bii höör stunnent gaud wat hilğlüü. Bii elker kâant stunnent lüchten, fan 'n gröet't as 'n toorn tau 'n lütje kêers was d'r als mit manken.

"Wiif!", see däi fisker un keek höör recht lâang an, "Büst duu nuu paaus?"

"Jóó!", see s' doo, "Ik bün nuu paaus!"

"Ach!", see däi fisker, "Wat is dat mooj, dat duu nuu paaus büst. Nuu wees t'free! Doo duu paaus büst, kaast duu niks hoogers worden."

"D'r wil ik insent oover slóópen!", see dat wiif un gung up bäer.

Man säi was näit t'free un däi hebberġkaid leet höör näit slóópen. Säi wul no meer worden. Doo däi süen rees un säi tau 't fenster uut keek, doch säi: "Kan 'k näit ook däi süen riisen lóóten?"



Doo wur säi düel un stöt höör keerl in d' siid: "Keerl góó nóó d' but tau! Ik wil as däi läief God worden!"

Däi fisker was no häil duuselk, man häi ferfeerde sük soo fäel, dat häi tau 't bäer uut ful.

"Ach wiif", see häi, "biidenk 't un bliiv paas!"

"Nee!", see dat wiif un reet sük dat liifstük köt, "Ik kan mii näit biidoren, doo ik däi süen un däi móón näit riisen lóóten kan! Ik maut as däi läief God worden!"

"Ach wiif!", see däi fisker doo, "Dat kan däi but noojt! Kaisers un paausen kan häi móóken, man dat näit."

"Keerl!", see s' doo un leet d'r häil griiselk fan of, "Ik wil as däi läief God worden! Góó nóó d' but tau!"

Doo truk hum 'n skrikkelk bângt döör d' leeden, dat häi fan nood bloot soo trilde. Buuten gung d'r 'n rûuğ stöorm t' keer, däi âal boomen uutreet un fandöör waajen un swoer flinten as föögels döör d' lücht kaiern leet. Doo sağ häi, woo däi säj bloot no eemer swâart un hooğ bulgen was as of sük 'n häel fan wóóter fööer hum oopenboren dee. Häil bâng see häi:

"Mantje! Mantje! Timpke täj!

Butje! Butje in d' säj!

Miin wiif, däi llsbil,

wil näit soo as ik wal wil."



"Wat wil s' dan?", see däi but.

"Ach!", see häi, "Säi wil as d' läief God worden."

Doo see däi but: "Góó man tau, säi sit't al weer in 't pullenhütje!"



Un dor sittent s' fandóóëĝ no.